

Ûn di illa vita da la meglra giarsuna da FaGe dal Grischun

Dürant il december passà ha la giarsuna specialista da sandà (FaGe) Ladina Kirchen fat part als champiunadis da manster chantunals. Tanter las ündesch partecipantas e partecipants ha ella persvas a las expertas e'ls experts il plü ferm.

Ladina Kirchen (18) da Tschlin ha chattà sia professiun da sömme – specialista da sandà (tud. FaGe). Seis plaschair vi dal manster e seis savair ha ella preschentà pro'ls champiunadis chantunals da FaGe i'l december passà. Qua ha ella guadagnà il titel da la meglra giarsuna. Quist titel parta ella cun ün'ulteriura giarsuna da FaGe da l'ospital a Tusaun. «Eu nu sun ida a quella concorrenza cun l'intent da gudagnar, dimpersè per pudair far novas experienzias», disch Ladina Kirchen. Istess ha ella persvas a la giuria e fat la prüma piazza, uschè ch'ella s'ha qualificada pels «SwissSkills» chi han lö quist utuon.

Avair umor e rier d'ürant la lavur

Ladina Kirchen fa seis terz on dal giarsunadi i'l «Center da sandà Engiadina Bassa» a Scuol. «Quai chi'm plascha pro quist manster es ch'eu poss güdar a las paziaintas e'ls paziaints e tils regalar eir mincha di ün surrier.» I'ls ultims ons es ella dvantada ün'allroundra e bainvissa pro las paziaintas e'ls paziaints. Per ella es, sco cha Ladina Kirchen disch, la comunicaziun ed esser averta il plü important pro la chüra da las persunas.

S'inclegia vegnan tenor ella pro eir las incumbenzas-clav chi's stopcha



Ladina Kirchen es cuntainta d'avair chattà ün manster chi tilla satisfa.

fotografia: RTR

savair far in möd concentrà e professional – «güst uossa cur chi va vers ils examens finals dal giarsunadi».

Dar la fiduzcha e na surchargiar

Ladina Kirchen es gnüda accompagna da l'instructura Sonja Schmidt d'ürant l'inter giarsunadi. «Cur ch'eu n'ha dudi cha Ladina es gnüda prüma n'haja schon gnü plaschair ed ün pa eir baja», disch la tutora. Tenor ella esa in prüma lingia important dad esser qua per las giarsunas e'ls giarsuns. Novas incumbenzas introdüa ella pass per pass – per na surchargiar a la giuventüna.

Ch'ella muossa las novas incumbenzas adüna tenor il medem schema, disch l'instructura: Il prüm guardan ils giarsuns e las giarsunas be che ch'ella fa. Davo vegna lura exercitá svesa suot survaglianza. A la fin, cur cha Sonja Schmidt vezza cha'ls giarsuns han avuonda sgürezza, tils dà ella la fiduzcha e la respunsabilità.

Esser in buns mans

Dad esser a l'ospital es d'inrar ün'esperienza agreabla, schi s'es però i'ls mans da la meglra giarsuna da FaGe, lura es il sogiuorn plü liger. Nicolo Roner da Sent ha gnü ün'operaziun plü gronda ed es per quist motiv restà ün pèr dis in l'ospital per as reabilitar. El disch ch'el stima fich la lavur da la giarsuna Ladina Kirchen ed as fida cumplettaing dad ella.

«Ladina dà cumplainamaing il sentiment dad esser in buns mans», disch Nicolo Roner, ch'ella saja adüna qua pellas paziaintas e'ls paziaints. «Schi dà üna jada ün problem, lura esa be da sclingir e Ladina vain be subit per dar sustegn.»

Lukas Quinter/RTR